

Supervizor za Brčko donosi Nalog supervizora kojim se reguliše status



Supervizor za Brčko, dr Raffi Gregorian, donio je danas [Nalog supervizora](#) kojim će, u slučaju bilo kakvog postupanja koje ima za cilj da rezultira podjelom, likvidacijom ili onemogućavanjem Elektroprenosa BiH da funkcioniše kao pravno lice, imovina te kompanije koja se nalazi u Brčko Distriktu i dalje pripadati samo Elektroprenosu BiH, osim ukoliko ta kompanija prestane da postoji kao pravno lice. U tom slučaju, imovina Elektroprenosa BiH u Brčko Distriktu automatski će se smatrati imovinom Brčko Distrikta u skladu sa Konačnom arbitražnom odlukom, Aneksom Konačne arbitražne odluke i Ustavom Bosne i Hercegovine. To konkretno znači da nijedan entitet niti entitetsko preduzeće ne može potraživati ovu imovinu ili je koristiti van okvira zakona BiH.

Ovaj nalog je u skladu sa stavom 12 Aneksa Konačne odluke koji je Arbitražni tribunal donio 18. avgusta 1999. godine, u kojem se navodi da se društvenom/javnom imovinom u Distriktu ne smije raspolagati osim ako je to u skladu sa zakonima BiH i uz odobrenje supervizora. Kada se radi o električnim vodovima koji se nalaze u Distriktu, ovaj uslov je dodatno naglašen u Sporazumu o sprovođenju obaveza entiteta iz Konačne arbitražne odluke za Brčko u vezi sa isporukom električne energije od 25. septembra 2001. godine.

Supervizor za Brčko odlučio je da donese ovaj nalog jer je ozbiljno zabrinut zbog postojećih blokada u funkcionisanju Elektroprenosa BiH, za šta postoje jasne indikacije da oni koji su odgovorni za te blokade namjeravaju da nezakonito promijene status i poslovanje kompanije. On je stoga donio ovaj nalog kako bi eliminisao bilo kakve pogrešne zamisli koje

mogu postojati u pogledu krajnjeg vlasništva nad imovinom Elektroprenosa koja se nalazi u Brčko Distriktu, čak i nakon okončanja supervizije.